

Lettre Jèrriaise- Aline Cattermole- 30th January 2021

Bouônjour bouonne gens! Ch'est Aline Cattermole tch' a l'pliaisi d'vos présenter la Lettre Jèrriaise à matîn, lé trente dé Janvyi 2021. Pouor c'menchi, j'vos souhaite eune raide bouonne année à tous: du bonheu, et pis sustout eune bouonne santé.

Nos v'là don à la fin du mais d'Janvyi, tout plien d'espé tandi qué l' vaccîn tchi s'en va, nou dit, nos protégi contre la Covid, c'menche à êt' injecté ès habitants d'l'île. D'abord, ch't' Hivé, ès pus anciens et fragiles. Et pis, duthant l'Èrnouvé au reste des habitants. Ch'est-i' qu'i faudra vaccîner les mousses étout? Pouor achteu, nou n'sait pon. J'crai même qu'les docteurs né s'accordent pas sus la tchestchion.

Eune chose est seûthe: l'espé est grand entouor lé vaccîn. J'espéthonnons èrtouônner à not' vie dé d'vent, bein embârrassée auve lé travas, l's activités, les réunions auve la fanmil'ye et l's anmîn, les viages, et la boutiqu'sie en Ville. Eune vie en touôgnêthie, ou comme disait la chant'rêsse Française Edith Piaf "le tourbillon de la vie"

Mais, pouor châttchun d'nous, tch'est qu'i restetha dé chu "lockdown"? Tch'est qu'i restetha dé chatte pause imposée dans nos vies? La tchestchion est pérsonnelle et la réponse est probabliément difféthente pouor châttchun d'nous.

En touos cas, lé "lockdown" fut pouor tout l'monde l'occâsion d'arrêter ses activités normales ou d'les faithe difféthement. Cèrtains fitent sèrvi chatte pause pouor èrfliéchi entouor lus vie, d'aut' c'menhitent d's activités siez ieux tchi n'avaient janmais ieu l'temps faithe devant ch'na.

Pouor mé, lé "lockdown" a 'té l'occâsion dé pâsser pus d'temps auve man fis tch' a trais ans et j'ai hardi joui d'ches moments! J'trouvînmes eune activité qu'j'aimons bein faithe les deux d'nous quand j'sommes siez nous: la gâchin'nie! J'dis gâchin'nie mais en réalité ch'est graie toute sortes dé gâches, dé podîns et d'chucrin'nie! J'griyînmes des gâches auve toutes sortes dé frits: pommes, paithes, bananes, j'griyînmes des galettes, des pains d'êpices, des mousses dé chocolat, des dattes fouôrrées auve dé la pâte d'amande et tout plien d'aut' fricots.

I fallit exlyitchi calmément à man fis qu'nou fait sèrvi la rouôlette à pâte pour étaler la pâte et pon pouor taper les gens, comme i' criyait lé p'tit malîn, et qu'i' faut mett' la flieu dans la bolle et pon dans l'aithe "pouor faithe tchiae d'la né" comme i' m dit! J'sis heutheuse d'avoir pu pâsser du temps auve man fis duthant lé "lockdown", ch' tait du fourbi mais ch' 'tait hardi du fanne étout.

Eune aut'chose qué j'fis duthant lé "lockdown" ch'est man bouais d'fanmil'ye. J'avais tréjous ieu l'idée dé l'faithe mais j'n'avais jamais ieu l'temps. Et bein, v'là qué ch'tait l'occâsion. Et je n'èrgrette pon! J'découbris un tas d'tchi entouor mes anchêtres et l'histouaithe dé ma fanmil'ye. Ches décourvèrtes fûtent surprannantes, et hardi hardi êmouvantes! J'savais qu'mes originnes 'taient mêlées mais pon autant!

D'vent d'faithe man bouais, j'savais déjà un mio entouor mes pathents et mes grand-pathents mais je n'savais quâsiment rein entouor les générâtions dé d'vent.

J'savais qu'man péthe fut né à Falaise en Nouormandie, comme mé, d'eune méthe Nouormande et d'un péthe Italien du Piedmont, eune région au Nord dé l'Italie. J'savais qu'ma méthe fut née en Algérie Française d'eune méthe Italienne dé la Sardaigne et d'un péthe Français d'originne Espangnole.

Et bein, eune chose încriyabl'ye est qu'eune grand' part dé mes anchêtres d'meuthaient dans d's îles! L's Espangnos 'taient d'Menorca ès îles Baléares, les Italiens 'taient dé Gozo à côté d'Malte et d' l'île dé Saint Pièrre en Sardaigne! I' pâlaient tous la langue dé lus île en pus d'l'Italien et d'l'Espangno. I' tchittitent tous lus île pouor chèrchi du travas et pouor offri un av'nîn miyeu à lus êfants.

Jé n'savais pas tout ch'na. Tchi surprîNSE! La chose amusante est qué tchiques générâtions pus tard, j' èrtouônnis à vivre dans eune île: Jèrri. Et j'ensîngne la langue dé ch't' île! Y'a cèrtainement un écho entre lus vie et la meinne!

Et bein ch'est tout pouor aniet. Mèrcie bein des fais pouor m'avoir écoutée et à bêtôt!

Lettre Jèrraise- Aline Cattermole- 30th January 2021

Hello everyone! It's Aline Cattermole who has the pleasure to present you with the Lettre Jèrraise this morning, Saturday the 30th of January. To start, I would like to wish you a very Happy New Year. I wish you happiness and most importantly a good health.

Here we are, at the end of January, full of hope while the vaccine, which is going to protect us from Covid, starts to be injected into people within the island. First, during this winter, to old and vulnerable people. Then, during Spring time, to the rest of the population. Will it be necessary to vaccinate children as well? For now, we don't know. I believe doctors do not even agree about that question.

One thing is sure: hope is great about the vaccine. We hope to return to our prior life, busy with work, activities, gathering with family and friends, travels and shopping in town. A whirling life or, like Edith Piaf the French singer would say: "the whirlwind of life".

But, for each of u, what will be left from this lockdown? What will be left from this imposed pause in our lives? The question is personal and the answer is probably different for each of us.

In any case, the lockdown was for all the opportunity to stop our normal activities or to conduct them in a different way. Some used this moment to reflect upon their life. Others started new activities from home, which they never found the time to do priorly.

For me, the lockdown was the opportunity to spend more time with my three-year-old son and I have really enjoyed these moments. We found an activity we really enjoy doing together, when we are at home: baking. I say "baking" but in reality, it is about making all sorts of cakes, puddings, and sweet treats. We made cakes with all sorts of fruits including apples, pears and bananas. We made biscuits, ginger breads, chocolate mousse, dates filled with marzipan and many other delicacies.

I had to calmly explain to my son that a rolling-pin is to roll out the dough (and not to hit people with!) and that we need to put the flour in a bowl and not on the floor "to make it snow" like he said. I'm happy I could spend more time with my son. It was messy but it was a lot of fun.

Another thing I did during the lockdown is my family tree. I had always the idea of doing it but I had never found the time. Well, that was the opportunity. And I don't regret it. I discovered a lot about my ancestors and my family history. Those discoveries were surprising but above all very emotional. I knew that my origins were mixed. But not that much!

Before doing a family tree, I already knew a bit about my parents and grandparents history but I didn't know much about the prior generations. I knew my dad was born in Falaise, Normandy (like me) from a Norman mother and an Italian father (from the Piemont region in the north of Italy). I knew my mum was born in French Algeria from an Italian mother (from Sardinia) and from a French father with Spanish origins.

Well, something incredible I found is that a large part of my ancestors used to live in islands. The Spanish were from Menorca in the Balearic Islands. The Italians were from Gozo, the island next to Malta, and from San Peter Island (Isola di San Pietro) in Sardinia. They used to speak the language of their islands in addition to Spanish and Italian. They all left their island to look for work and to offer a better future to their children.

I didn't know all of that. What a surprise! The funny thing is that a few generations later, I came back to live on an island: Jersey. And I teach the language of this island. There is certainly an echo between their lives and mine!

Well, that's enough for today. Thank you very much for having listened to me. Bye for now!